

Filimon

Sepinien xa Diamu ni Uvei xa Pol Tetisi Teha mi Filimon

Visi tetis uvei ak?

Pol tetis sepinien ak (1:9,19) e huraam xa sangas ni 64 AD e melele taxa tetis uvei tei mi Kristin xil e taon tahal Kolosi. Pol tete nim te xeih e taon xa mahulong tahal Rom (Polien 28:16-31), e tetis uvei xalu ak e telingi e he Taetikas e Onesimas tangan lalihuri e lalisa ni mi ngan xil tahal Kolosi (Kol 4:7-9).

Visi iaxa tevuli uvei ak tetiamu?

Pol tetis sepinien ak teha mi moletin tei te sias tahal Kolosi, hisen Filimon (1:1). Texo polien na Pol e Kolosi, Filimon mei be Kristin tei (1:19). E Filimon temae ni Kristin xil di latevituei e tim san (1:2). Xi tehe eilep tei xa teleh slev xil di latepol mini (1:16). Pol tetis uvei ak mi Filimon tangan vasisi vahur pilei rilomun ni slev tei nan, hisen Onesimas (1:9-10).

Pol tetis uvei ak veneh?

Pol en tehei tangan vapisen suse xa Kristin xil liketeh ihos ni ngan xil xa di lasa mi xil - Nggusil rae na mol-Rom xil, momal tangan Filimon vahas vin Onesimas vengam xa xi mikan ni neta tei nan e milesae relingi (1:18-19). E Pol tesis Filimon tangan iketeh ihos rilomun ni Onesimas (1:9-10). E tesis mun tangan ipol ihos mini e napol ni ti mun mini naxoni xi be slev tei nan tang. Ipol ni mini ixoni ngan xa xi be tuneli tei e neketen (1:15-16). Imak, ma xir mun rakila riketeh ihos rilomun mi ngan xil xa lapol misa mi xir.

Pol en tehei tangan vapisen ni xa, pe met Hi, xir vus rapin tang - E melele xa Pol temeul teta, ngan xil xa labe eilep, e ngan xil xa labe slev nae, lasakras lamos vituei. E nggo Iesu, xir vus rapin tang (1:1-2,16,23-24), neta sav xos rabe eilep mu rabe slev, rabe moletin xa holesok nar holu mu rabe hoeo tang, rabe moletin te maluxoluk mu rabe metalo, mu rabe malahos mu rabe atou. Vengam xir vus xa di raneket e Iesu, rapin tang pe met Hi.

Pol en tehei tangan vapisen sexien te merereen - Pol tehe eilep te sias e tekila vasepin vaxeih mi Filimon tangan ihur pilei Onesimas e navasi ti (1:8). E vengam xa Pol temerere ni Filimon, xi tesa sepinien xa tehos tang mini (1:9,14) e tesis

tengan vapol vahos mi Onesimas (1:21). Bos xa xir mun rimerere ni moletin sav xil.

Vatit nenemien tei te uvei ak de Filimon 1:15-16

Nahe xos Hi temaen Onesimas telesae relinguk vuteili tangan melele xa itilomun ihat, xi ikila ita kat visaluk vehakut. E taxeak, xi tave slev nam ti tang. !E-e! Xi bos mak mu mili slev tei, xi mei be tumali hos tei. Eheien navan di en, e xouk, eheien nam iti en ili, vengan xi be slev nam, e be tumali mun vari e his Suv Iesu.

Naha iaxa de sepinien ak?

1. Pol besi xi himetu ve polien na Filimon (1:1-7)
2. Pol misis Filimon tangan iketeh ihos rilomun ni Onesimas (1:8-25)

Sepinien xa diamu

¹Inou Pol, nade nim te xeih vengan xa di nabit rat longeongen hos usil Iesu Kristo.

Inou del tumali Timoti, mabit bos makoe minuk, Filimon. Xouk obe moletin hos tei te polien na Iesu nggoni xamel e eheien namel di e xouk. ²Mabit malhit bos makoe mun mi Apia, xa nggoni tuxohin tei namel. E bos makoe mun mi Akipas, xa di pol mi Iesu nggoni moletin hos tei te vaeen nan nggoni xamel. E bos makoe mun mi ngan xil xa langgusil Hi xa di lasukul e tim sam.

³Nasis tangan eheien hos e tomat na Hi Tamer e Suv nar, Iesu Kristo, iti mi xamim.

Pol Misep Usil Eheien e Neketen na Filimon

⁴Tuxoli Filimon, melele xa di nanem xatuk e sisen xil navan, vehakut di names Hi ve xouk. ⁵Nasis mak vengan xa nalongeong usil neketen nam e Iesu Kristo, e eheien xa di opisen ni mi moletin xil na Hi. ⁶Nasis mi Hi tangan melele xa mumei vituei, isak ni neketen namim ixeh mu, e isak ni xamim mukilakil kuhi ni holesok hos xil vus xa be namim vengan mubisti del Iesu Kristo. ⁷Tuxoli, eheien nam mi mosav misak ni nou nabesi pupu ni nou e di dal rat nenemien na moletin xil na Hi.

Pol Misis Filimon Tangan Ihur Pilei Slev Nan xa Telesae Relingi

⁸Vengan xa nakil kuh eheien nam mi mosav xil, inou nakila xa xosxa nisemae minuk e his Iesu Kristo tangan upol ni neta ngan, ma xouk upol ni. ⁹E nabesi nou tang tangan nisisuk upol ni naha xa ieok bei ve eheien nam e nou, xa nabe momatu ngamu e nade nim te xeih taxeak ve his Iesu Kristo. ¹⁰Nasisuk ve rin na Onesimas. Xi nggoni horamue tei navan vengan xa, melele xa nade nim te xeih, natetutou ni e xi tekamet meulien hu. ¹¹Tetiamu, melele xa telesae relinguk, xi tenave moletin

hos te tutouen ti. E taxeak, xi bos tangan itutou ni xouk, e itutou ni nou mun.^a

¹²Eheien navan di pupu e Onesimas. E neta sav xa mak, di nasa rilomun ni bat minuk. ¹³leok bei tangan namur xati vate visal nou vaxolesuk tangan vatutou ni nou e melele xa nade nim te xeih ve longeongen hos xa di nabithiteni. ¹⁴E ieok ti tavei napol ni ti neta xa xouk otamaen nou ti tangan napol ni. !E-e! leok bei tangan nipol ni naha xa xouk kestang di onemi obit bos. Isak ni, tutouen xa usa ni minou ihusil nenemien hos nam kestang, e nave ti vengan nangegeh xatuk tangan opol ni.

¹⁵Nahe xos Hi maen Onesimas telesae relinguk vuteili tangan melele xa itilomun ihat, xi mikila ita kat visaluk vehakut. ¹⁶E taxeak, xi tave slev nam ti tang. !E-e! Xi bos mak mu mili slev tei, xi mei be tumali hos tei. Eheien navan di en, e xouk, eheien nam iti en ili, vengan xi be slev nam, e be tumali mun vari e his Suv Iesu.

¹⁷Mak ma, xosxa onemi obit rupol mi Suv tei takes, ma uhur pilei ixoni ngan taxa ovur pilei nou. ¹⁸Xosxa xi tepol ni neta tova tesa minuk, mu pol ni kaon tei delak, inou iaxa nixal rati. ¹⁹!Pus ti mu! Nadis ngan ak ni heok xati: *Inou Pol nixal rat holesok xil xa be kaon na Onesimas.* (E xouk iem nabovorong ni kaon nam ti xa del xat nou, vengan xouk otehur meulien hu texo nou.) ²⁰Tuxoli hos navan li, ieok bei pupu tangan upol ni naha xa inou di nasisi minuk vengan ralu vus rube moletin na Iesu Kristo. Ngan ak isak ni nou nipolu ni sien.

²¹Melele xa di ladis sepinien navan xil ak, inou nakil kuhi mak xa xouk upol ni ixoni ngan xa di nasisi. !Io! E nakila xa upol ni ili. ²²Nabit nasikus mun ve neta tei: usak mesen vontoen tova e nim mam tangan mei nita en. Vengan nake reitin xa Hi isa huit sisen namim tangan nistal ra nim te xeih ak e nihat nite visal xamim rilomun.

Sepinien Kor

²³Epapras xa de nim te xeih del nou ve his Iesu Kristo, xi bit 'bos makoe' minuk. ²⁴E Mak, Aristakas, Dimas e Luk mun xa di mapol vituei, xil mun labit lavit 'bos makoe' minuk.

²⁵Nasis tangan eheien hos na Suv Iesu iti mi xamim vus.

^a 1:11 Onesimas be slev tei na Filimon. His Onesimas, koute teni be 'bos te tutouen'. Misak ni, Pol di misep tetoh usil hisen.